



partii naleraq

Nuuk, 14. april 2015

Anthón Frederiksen

UPA2015/120

Aningaasaateqarfimmi aningaasat katersat ileqqaakkallu erniaat taamaallaat atorneqarsinnaaneri siunertaralugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalakkersuisut peqquneqarnissaannut Inatsisartut aalajangiiffigisassaattut siunnersuut.

UPA2015/121

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Inatsisartut ukiut tulleriissut aappassaanni nunatta karsiata naatsorsuutaanik aatsaat akuersereeraangata aningaasaateqarfik aallartinneqartassasoq, aatsaallu ukiumi naatsorsuiffiusumi aatsitassanit isertitat 10 millioner kroninit annertunerusimappata. Inatsisartut inatsisaat ukiup tullissaani 1. januarimi atuutilissaaq imaluunniit Naalakkersuisut aalajangiippata siusinnerusukkut. 10 millioner kronit taaneqartut Inatsisartut ukiumi pineqartumi Aningaasaqarnermut inatsisaat naapertorlugu ataatsimut isigalugu akit akissarsiallu nalingannut naleqqussarneqartassapput.

UPA2015/122

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut kingusinnerpaamik UPA2016-imi Naalakkersuisut peqquneqarnissaannut Inatsisartut aalajangiiffigisassaattut siunnersuut, imaalillugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni aatsitassarsiornermit isertitanut paasinninnera Namminersorneq pillugu inatsimmi aatsitassarsiornermit isertitanut paasinninnermit immikkoortinneqassasoq.

Allannguinermi tigussaasumik atortut, soorlu oliamik maqisuunnginnissamut atortut, illuutit sanaartukkalluunniit allat atortullu Kalaallit Nunaata Aatsitassarsiornermi Aningaasaateqarfiani aatsitassarsiornermit isertitatut naatsorsuutigineqannginnissaat allanneqartariaqarpoq.

(Inatsisartunut Ilaasortaq Naaja H. Nathanielsen)

Siullermeerneqarnera

Inatsisartunut Ilaasortaq, Naaja H. Nathanielsen, Inuit Aqatatigiinneersup siunnersuutai pingasut Partii Naleqqamiit imannak oqaaseqarfigissuagut.

Partii Naleqqamiit aallaqqaasiullugu aatsitassarsiornermut tunngatillugu anguniakkavut siunertavullu pingaarnert erseqqissarumavagut, tassalu pisuussutitta uumaatsut maani nunami nunaqavissunik sapinngisaq tamaat iluaqutigineqarnissaat iluanaarutigineqarnissaallu tamakkiisumik sulissutigissallugu.

Tassami ukiorpassuani takujuaannarsimavarput aatsitassat pisuussutivullu uumassusillit suugaluartut nunatsinniit imartatsinniillu nunani allamiuniit akeqanngitsumik killeqanngiusattumillu annissuunneqartarsimasut.

Taamaammat aatsitassarsiornermut tunngatillugu qularutigineqassanngilaq Partii Naleraq tassaammat pisuussutinik uumaatsunik uumassusilinnillu atuinissamut maani nunaqavissunik salliutitsinissamik pingaartitsisoq.

Tassami Partii Naleqqamiit assut pingaartipparput nunatsinni imartatsinnilu pisuussutit assigiingitsut sapinngisamik nunaqavissunik tamakkiinerusumik atorluarneqarnissaat iluaqutigineqarnissaallu, kisianni soorunami pisuussutit uumassusillit eqqarsaatigalugit aamma kinguaassatta pisassaarnissaat eqqarsaatigalugu.

Taamaammat aatsitassarsiorneq eqqarsaatigalugu Partii Naleqqamiit aatsitassarsiornermut aningaasaateqarfiup erniaritikkumagassaasa kisimik isumalluutigineqarnissaat kisiat eqqarsaatiginngilarput.

Taamaammat anguniagaq siulleq Partii Naleqqap siunniussaa tassaavoq aningaasaateqarfik pineqartoq sapinngisamik aningaasanik amerlanerpaanik immersortuarneqassasoq, aatsaallu pisariaqarluinnarfiatigut aningaasaateqarfimmiit atuisinnaaneq pissutsinut maannakkut ilisimanngisatsinnut naapertuuttumik nalilersorneqartassasoq.

Soorunami Partii Naleqqamiit ilisimavarput, aningaasaateqarfik sunaluunniit aalajangersaanissanut assigiinngitsunut tunngaviusunik malittarisassaqaqtariaqartoq, kisianni taamaakkaluartoq inatsisit aalajangersakkallu sulluunniit naassaangitsumut atuuttussanngorlugit suliarineqarneq ajormata, aalajangersakkat ukiut ingerlanerini allanngortinneqartarumaarnissaat aamma avaqqunneqarsinnaassanngilaq.

Taamaammat maannakkuugallartoq aningaasaateqarfik oqaatigilluaannarlugu “imaqanngitsoq” annerusumik “qissatiginissaanut” Partii Naleqqamiit pissutissaqanngilavut.

Taamaammat aamma aningaasarpassuarnik maannangaaq taaguereernissaq qanorlu aningaasat atorneqaarumaassanersut siulittuutiginnissaat pissusissamisoortutut takorluunngilarput.

Partii Naleqqamut pingaernerpaavoq, aningaasaateqarfiup kinguaassatsinnut qulakkeerinniffiusussatut sillimmatigineqarnissaa, taakkuami taamanikkussamut pisariaqartitsineq naapertorlugu aammalu pissutsit taamanikkussamut uagut ilisimanngilluinnakkavut tunngavigalugit naleqqussartartussaassammatigik.

Kisianni aamma Partii Naleqqamiit nunatta aningaasaqarnera eqqarsaatigalugu aningaasaateqarfik inatsisitigut tunngavissinneqareersimasooq sooq aningaasaateqarfik taanna annertusillugu atorluarsinnaanngilarput, tassami nalunngilarput aningaasarpassuit kalaallit nunatsinniik avammut akiliutitut ukiut tamaasa aniatittuarpavut annerusumillu iliuuseqarfiginagit.

Tassani assersuutitut eqqaasinnaavagut Namminersorlutik Oqartussat sillimmasiinermut aningaasartuutigisartagaat ukiut tamaasa minnerpaamik 32,5 million koruuninik naleqartut. Aningaasat nunatsinni iluaqutigineqarnerullutik sulisinneqarsinnaagaluartut.

Qanorli kommunit allarpassuillu sillimmasiinerinnarnut aningaasartuutai tamaasa ilanngukkaanni, sooq nunatta aningaasaqarneranut iluaqutaasinnaasut tamaasa ataatsimut katillugit arlaatigut iluaqutiginiarsinnaanerunngilagut? Aningaasanik avammut annissuiinnarnersuaq unitsinniartigu!

Taama Partii Naleqqamiit oqaaseqarluta suliap aappasaanneerqannginnerani ataatsimiititaliami susassaqtumi eqqartoqqissaarneqarnissai inassutigaarput.